

### Gryphius, Andreas: 3. (1640)

- 1 Welt Rase wie du wilt! hier hab ich Christi Wunden
- 2 In welchem ich/ wen Creutz/ Angst Hell' vnd Tod ansetzt/
- 3 Vnd Sünd vnd Teuffel Trotz/ die Seele freygeschätzt/
- 4 Die Seele/ die nu hier gewünschte Ruh gefunden.
- 5 O der du dich mit mir von Ewigkeit verbunden
- 6 Mein Herr vnd auch mein Gott/ den meine Schuld verletzt
- 7 O zeig auch mir/ wie du den Thomas hast ergetzt
- 8 Dein offen Hertz vnd Hand/ vnd Fuß in jener Stunden.
- 9 In der die gantze Nacht der Hellen auff vns dringt
- 10 Vnd diß mein schwaches Haus der letzte Feind bespringt
- 11 Sprich; Friede! wenn ich nun muß mit dem Tode Kämpffen
- 12 Reiß alle zweifel Strick mit starcker Faust entzwey
- 13 Die Angst vnd Sathan knüpfft steh wen kein Mensch kan bey
- 14 Vnd hilff durch deinen Sieg der Feinde Schaaren dempfen.

(Textopus: 3.. Abgerufen am 23.01.2026 von <https://www.textopus.de/poems/54478>)